

Lisette Gomes a revela

Hopi caso full investiga di abuso sexual di mucha ta yega O.M. pero no ta pasa nan pa Hues



ORANJESTAD (AAN): A sali na cla awor, cu tin varios caso di Abuso Sexual di Mucha, cu a wordo extensamente investiga na Aruba, y tur rapport di JZP y tambe di Specialista Medico ta wordo poni den lachi di Ministerio

Publico, y nunca ta yega dilanti Huez!

Pueblo awor si a fada, y kier cambio. Tur cos ta cla, pa awe pueblo di Aruba subi caya y demostra cu bo ta exige castigo mas severo contra esnan cu ta comete Abuso

Sexual cu mucha.

Den un entrevista cu Lisette Gomes di Fundacion Lisette Gomes contra Abuso Sexual di Mucha, el a splica cu e manifestacion definitivamente lo ta awe Diamars 21 di Februari 2017, y un carta di

protesta lo wordo entrega na Procurador General.

Ta asina cu na April aña pasa a tene un Manifestacion caba, unda cu nan a bay para dilanti Parlamento y tambe dilanti Bestuurskantoor pa entrega un Manifesto, pero lamentablemente te cu awor nan a keda na promesa cu lo bin cambio, pero esey no ta e caso.

Segun Sra. Gomes, desde aña pasa te cu awor, a instancianan a haya mas keho y caso di Abuso Sexual cu a drenta! Prensa no a haya sa di nan, pasobra hopi famia di victima ta prefera pa e storianan aki no bay den prensa, pasobra nan kier defende nan yiu. Nan no kier pa expose e storia, pa e muchanan nan number skeiro tur caminda.

Lo peor ta, cu tin hopi caso full investiga di Abuso Sexual, di cual e caso ta yega na Ministerio Publico completamente cla... pero sorprendentemente no ta bay Corte.

Pesey awor ta bay entrega un Carta di Protesta na

Ministerio Publico.

E organizador di e Manifestacion, a pidi pa topa 2:30 pm dilanti Ministerio Publico, y pa 3:00 pm por entrega un carta pa muestra e mal contenido, riba e.o. castigonan abao cu Fiscal ta pidi, y tambe casonan cu nunca a yega Corte, di cual tin pruebanan medico suficiente pa asina persigui e criminal.

“Nos kier invita pueblo en general, bin yuda nos, uni na elucha aki awe Diamars pa 2:30 pm. Nos ta pidi tur hende bin bisti na preto, pasobra ‘Aruba ta di Luto’ pa hopi aña caba e isla aki no ta hayando e atencion debido na abuso sexual di mucha na Aruba.”

Esnan cu a participa na April aña pasa, ta pidi pa esnan cu tin e T-Shirt ainda di Stop Abuso Sexual di Mucha, pa nan tambe acudi na e Manifestacion. Bo por bin cu bo borchu tambe, y muestra cu nos no ta acepta e castigonan asina abao cu ta pidi pa esnan cu ta comete e fechorianan aki.